

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

MIŠLJENJE

**po Zahtjevu privrednog subjekta Apatinska pivara d.d. Apatin, Trg osolobodenja 5, 25260
Apatin, Republika Srbija**

**Sarajevo,
septembar, 2015. godine**



Broj: 01-26-7-013-5-I/15
Sarajevo, 10.09.2015. godine

Na osnovu člana 25. stav (2) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu za davanje mišljenja privrednog subjekta Apatinska pivara d.d. Apatin, Trg oslobođenja br. 5, 25260 Apatin, Republika Srbija, podnesenom po punomoćniku, advokatu Dini Duraković Morankić, Kralja Tvrtka 6, 71000 Sarajevo, Bosna i Hercegovina, Konkurencijsko vijeće Bosne i Hercegovine je, na 108. (stotinuosmoj) sjednici održanoj dana 10.09.2015. godine, donijelo

MIŠLJENJE

Privredni subjekt Apatinska pivara d.d. Apatin, Trg oslobođenja br. 5, 25260 Apatin, Republika Srbija je, putem punomoćnika, advokata Dine Duraković Morankić, Kralja Tvrtka 6, 71000 Sarajevo, Bosna i Hercegovina (u daljem Apatinska pivara ili Podnosilac zahtjeva), dana 24.07.2015. godine pod brojem: 01-26-7-013-I/15, podnio Konkurencijskom vijeću Bosne i Hercegovine (u daljem tekstu: Konkurencijsko vijeće) Zahtjev za davanje mišljenja (u daljem tekstu: Zahtjev), o primjeni člana 7. stav (4) Zakona o konkurenciji ("Službeni glasnik BiH", br. 48/05, 76/07 i 80/09)(u daljem tekstu: Zakon) na ekskluzivni sporazum o uvozu i distribuciji između povezanih lica, uslijed promjene prinudnih propisa.

Odnosno, Podnosilac zahtjeva je također zatražio mišljenje Konkurencijskog vijeća o potrebi podnošenja zahtjeva za pojedinačnim izuzećem vertikalnog sporazuma koji predstavlja sporazum o isključivoj distribuciji, u smislu Odluke o grupnom izuzeću sporazuma između privrednih subjekata koji djeluju na različitim nivoima prodaje, odnosno distribucije ("Službeni glasnik BiH", broj: 18/06).

Naime, kako se navodi u Zahtjevu, privredni subjekt Apatinska pivara, kao proizvođač piva, svoje proizvode distribuira na teritoriji Bosne i Hercegovine putem osamnest distributera, privrednih subjekata koji imaju registrovano sjedište na teritoriji Republike Srpske i sa kojima zaključuje jednogodišnje ugovore.

Nadalje se navodi da je u 2015. godini došlo do izmjene u primjeni pozitivno-pravnih propisa na teritoriji Republike Srpske koji se odnose na uslove uvoza, deklarisanja i prometa prehrambenih proizvoda, a koji zahtijevaju izmjenu u načinu distribucije proizvoda privrednog subjekta Apatinska pivara.

Usvojenim Pravilnikom o dopunama pravilnika o deklarisanju hrane („Službeni glasnik Republike Srpske“, broj: 47/15)(u daljem tekstu: Pravilnik o dopunama), koji se odnosi na Pravilnik o deklarisanju hrane („Službeni glasnik Republike Srpske“, broj: 82/10), utvrđuje se obaveza proizvođača ili subjekta u poslovanju sa hranom koji tu hranu prvi stavlja u promet da na deklaraciji označi podatke o isključivo jednom uvozniku koji stavlja hranu na tržište Republike Srpske.

U skladu s naprijed navedenom zakonskom obavezom, privredni subjekt Apatinska pivara više nije u mogućnosti da svoje proizvode u Bosni i Hercegovini distribuira na dosadašnji način, te je prinuđen da izmijeni dosadašnji način distribucije svojih proizvoda na način da će:

- Povezano društvo privrednog subjekta Apatinska pivara – privredni subjekt Molson Coors d.o.o. Banja Luka, Jevrejska 50, 78000 Banja Luka, Bosna i Hercegovina (u daljem tekstu:

- Molson Coors d.o.o. Banja Luka), biti označen kao jedini, odnosno ekskluzivni uvoznik i distributer proizvoda privrednog subjekta Apatinska pivara, za teritoriju Bosne i Hercegovine;
- Raskinuti postojeće ugovore sa distributerima, uslijed nemogućnosti ispunjenja zbog promjene pozitivno-pravnih propisa;
 - Privredni subjekt Molson Coors d.o.o. Banja Luka zaključiti nove ugovore sa dosadašnjim distributerima, koji će biti u potpunosti u skladu sa postojećim pravima i obavezama ugovornih strana ugovora na snazi koji su u primjeni sa privrednim subjektom Apatinska pivara.

Prema Podnosiocu zahtjeva, namjera privrednog subjekta Apatinska pivara, koje se nalazi u isključivom vlasništvu privrednog subjekta Molson Coors SER d.o.o., Trg oslobođenja 5, 25260 Apatin, Republika Srbija, a koje je nadalje u 100% vlasništvu privrednog subjekta Molson Coors Netherlands B.V., Naritaweg 165, 1043 B.W. Amsterdam, Kraljevina Holandija (u daljem tekstu: Molson Coors Netherlands), jeste da raskidajući ugovore sa dotadašnjim distributerima, istovremeno zaključi ugovor o ekskluzivnom uvozu i distribuciji svojih proizvoda na teritoriji Bosne i Hercegovine sa povezanim društvom - privrednim subjektom Molson Coors d.o.o. Banja Luka.

Privredni subjekt Molson Coors d.o.o. Banja Luka se nalazi u 100% vlasništvu privrednog subjekta Zagrebačka pivovara d.o.o., Ilica 224, 10000 Zagreb, Hrvatska, koje se također indirektno nalazi u 100% vlasništvu privrednog subjekta Molson Coors Netherlands (naime, 100% vlasnik privrednog subjekta Zagrebačka pivovara je privredni subjekt Cervesia Zagreb d.o.o., Ilica 224, 10000 Zagreb, Hrvatska, a isti je u 100% vlasništvu privrednog subjekta Pivovary Staropramen s.r.o, Nadražni 43/84, Praha 5, Republika Češka, koji je nadalje u 99,995% vlasništvu privrednog subjekta Molson Coors, Netherlands).

Privredni subjekt Molson Coors d.o.o. Banja Luka ima namjeru zaključiti ugovore sa postojećim distributerima, istog sadržaja kao i ugovori koje je sa njima do tada zaključivao privredni subjekt Apatinska pivara, te neće doći do suštinske promjene u odnosu između privrednog subjekta Apatinska pivara, kao dobavljača i postojećih distributera, kao kupaca proizvoda, te kako se navodi u Zahtjevu:

- Vertikalni sporazum se zaključuje između povezanih lica;
- Svrha zaključivanja vertikalnog sporazuma je usklađivanje propisa koji se tiču deklarisanja proizvoda;
- Zaključivanjem vertikalnog sporazuma neće doći do promjene u načinu distribucije proizvoda privrednog subjekta Apatinska pivara, na teritoriji Bosne i Hercegovine, niti će to uticati na sadržaj ugovora koji su zaključeni sa dosadašnjim distributerima privrednog subjekta Apatinska pivara u Bosni i Hercegovini.

Članom 4. stav (1) i (2) Zakona propisano je šta predstavlja zabranjene sporazume i zabranjeno konkurencijsko djelovanje, na šta se isti odnose, odnosno koji zabranjeni sporazumi su kao takvi ništavni u smislu Zakona, dok je članom 4. stav (3) Zakona propisano kada sporazumi iz člana 4. stav (1) nisu zabranjeni i pod kojim uslovima.

Članom 5. stav (1) Zakona propisano je da Konkurencijsko vijeće, na zahtjev jedne ili više stranaka u sporazumu može donijeti rješenje o pojedinačnom izuzeću od zabrane sporazuma iz člana 4. stav (1) Zakona, ako sporazum ispunjava uslove iz člana 4. stav (3) Zakona.

Članom 7. stav (3) i (4) Zakona određeno je da se sporazumi koji ispunjavaju uslove iz člana 4. stav (3) Zakona ne moraju podnositi na ocjenu Konkurencijskom vijeću radi pojedinačnog izuzeća iz člana 5 Zakona, a da Konkurencijsko vijeće može pokrenuti postupak za ocjenu pojedinog sporazuma, po službenoj dužnosti i ili na zahtjev stranke, ukoliko njegovi efekti ne ispunjavaju uslove iz člana 4. stav (3) Zakona.

Odlukom o grupnom izuzeću sporazuma između privrednih subjekata koji djeluju na različitim nivoima prodaje, odnosno distribucije (vertikalni sporazumi) taksativno je određeno na koje

vertikalne sporazume se posebno primjenjuje grupno izuzeće, u kojim uslovima nastaje pretpostavka primjene grupnog izuzeća, te koja ograničenja i uslove isti ne smiju sadržavati.

Imajući u vidu naprijed navedeno, kao i podatke dostavljene u Zahtjevu, Konkurencijsko vijeće je utvrdilo da je, donošenjem Pravilnika o dopunama, za privredni subjekt Apatinska pivara nastala obaveza zaključivanja ugovora o uvozu sa samo jednim uvoznikom koji predmetnu robu, odnosno proizvod stavlja na tržište Republike Srpske.

Privredni subjekt Apatinska pivara slijedom navedenog, poštujući pozitivne propise donesene od strane Ministarstva poljoprivrede, šumarstva i vodoprivrede Republike Srpske, ima namjeru da zaključi ekskluzivni sporazum o uvozu i distribuciji sa povezanim licem, prilikom čega isti ne predstavlja zabranjeno konkurencijsko djelovanje.

Na osnovu naprijed navedenog Konkurencijsko vijeće smatra da samim zaključivanjem ekskluzivnog sporazuma ne postoje uslovi za primjenu člana 7. stav (4) Zakona, sa napomenom da sadržina namjeravanog sporazuma nije bila predmet razmatranja ovog Mišljenja.

Također, obzirom da je Mišljenje dato isključivo na osnovu podataka iz Zahtjeva, ukoliko isti odstupaju od stvarnog činjeničnog stanja ovo Mišljenje se ne može primijeniti.

Predsjednica

Maida Čampara

Dostaviti:

- **Dina Duraković Morankić, advokat**
- **U spis**
- **Arhiv Konkurencijskog vijeća**